

元明事類鈔

欽定四庫全書

元明事類鈔卷三

監察御史姚之駟撰

歲時門

春

賦清江引 明查應賓新史貫酸齋于立春小集客以
清江引請賦且限金木水火土五字冠于每句之首
句各用春字酸齋即題云金釵影搖春燕斜木杪生

春葉水塘春始波火候春初熟土牛兒載將春到也
迎春即至 明皇甫庸近峯聞畧正德冬駕幸揚州河
冰方合上問何時當解江彬對曰立春然尚有旬餘
日也上曰春迎之即至耳焉能候之命迎春于揚州
之東郊明日百花盛開河冰流澌

春聯 本朝陳尚古雜記春聯之設自明孝陵昉也帝
于除夕前忽傳旨公卿士庶家門上須加春聯一副
微行出觀以為笑樂偶見一家獨無詢知為奄豕苗

者帝大為書曰雙手劈開生死路一刀割斷是非根
投筆徑去

春加王上 畜德錄景泰時立春日正值聖節眾議慶
賀迎春之先後于肅愍至眾質之公曰迎春宜先眾
曰何據曰不見春王正月春加王上乎眾是之

親觀迎春 呂柟集武皇駐蹕留都親觀迎春寇公涂
水時為府丞啓具于郊外壁倖欲劾公遲延或曰此
人勁直不可動乃免

賦春陰 明詩話王欽佩為秀才時夢中聞人誦詩云
起來小步傍蘭堦花霧襲衣寒氣重宏治乙丑閣試
春陰題以夢中句入之李長沙批其卷云二句如有
神助遂登上選

咬春 金鑿退食記南花園在西苑門明時曰灰池植
瓜蔬于坑洞內烘養新菜以脩春盤薦生之用立春
日進鮮蘿蔔名曰咬春

賜春餅 燕都遊覽志立春日于午門賜百官春餅

結羊腸 揭傒斯詩正月十六日風光京師女兒結羊
腸焚香再拜禮神畢剪紙九道尺許長撚成對綰雙
雙結心有所祈口難說明趙雍詩結成羊腸腸反斷
惆悵春閨坐長嘆

春花 湧幢小品正統中每立春順天府別造春牛春
花進御前及仁壽宮中宮凡三座每座用金銀珠翠
等物費錢九萬餘

耍燕九 帝京景物畧京師人于正月十九日集白雲

觀曰要燕九彈射走馬焉吳寬燕九日詩京師勝日
稱燕九少年盡向城西走白雲觀前作大會射箭擊
球人馬吼

春事 明程羽文清閒供春時晨起點梅花湯課奚奴
洒掃護苔苔取薔薇露浣手讀書晌午採蕨作供汲
泉試新茗午後乘欸段携柑酒往聽黃鸝日晡坐柳
風前裂五色牋集錦囊句薄暮遠徑灌花

窮春盤 元耶律楚材驛中窮春盤詩勻和豌豆搯葱

白細剪萎蒿點韭黃

春不死 陳樵詩春在地中常不死月行天盡又飛來
春光一擔 馬臻西湖春日詩石函橋畔人烟晚挑得
春光一擔歸

望春如赦 張欲詩寒谷望春如望赦雨雨風風惡相
嚇

四時春 楊慎滇海曲天氣常如二三月花枝不斷四
時春

彩仗迎春 李東陽立春駕詣南郊詩暖香和露繞蓬
萊彩仗迎春曉殿開北斗舊杓依歲轉南郊佳氣隔
城來

賦兩春 王世貞集迎春日對酒客有談一歲兩春及
中秋再閏者賦之秋當好處仍留閏臘未窮時再見
春但使黃楊初厄過不妨青艸兩回新

花朝寒 袁宏道集燕地寒花朝節後餘寒猶厲凍風
時作作則飛砂走礫局促室內

元日

簽柏枝 明田汝成熙朝樂事正月朔日簽柏枝于柿餅以大摘承之謂之百事大吉

旦除詩卷 明詩話李杲堂云薛千仞年八十集其生平元旦除夕詩為一卷起萬厯庚辰至崇禎庚辰身為太平詞客六十年

鬧嚷嚷 北京歲華記元旦人家小兒女剪烏金紙作蝴蝶戴之名曰鬧嚷嚷

懷一品 靳史吳子充遊大人以成名嘗于元旦賦詩
懷分宜閣老其友聞之笑曰厯頭第一日懷中朝第
一品循是懷人雖歲除亦輪不到吾輩

綵勝雲屏 于慎行謝元旦賜門神掛屏葫蘆等物詩
綵勝曾分仙禁縷雲屏况借漢宮春

老畏歲朝 明何園客元旦詩老畏今朝至貧看去日
長

稀聞爆竹 明程孟陽元旦詩欲訪寒梅愁信遠稀聞

爆竹覺人遙

百花開 明吳兆詩閩中風景麗元旦百花開有岸
皆繁草無波不染苔

人日

草堂禮像 明朱日藩集升菴先生在江陽以畫像
寄我已未人日金大興何良俊諸君過余先生像
在壁間諸君不肯背之坐各東西席覓陽羨茶烹
中冷泉為供作禮畢各嘆曰幸甚今日乃得覩升

菴先生也文子作人日草堂圖以寄先生并令諸君各賦詩于上

與春并 趙孟頫人日立春詩今年人日與春并人得春來喜氣迎

人日南郊 明胡儼人日從駕行南郊詩千門萬戶東風暖勝裡金花剪綵新

人無賴 明高承埏人日詩人日人無賴春風春可憐
元夕

罷燈山 元史泰定帝以元夕勅構燈山于內庭御史
趙思魯以水旱請罷從之

太平鼓 帝京景物畧上元時童子搖鼓傍夕向曉曰
太平鼓

侍母往觀 明通紀永樂十年正月元宵賜百官宴聽
臣民赴午門外觀鰲山自是歲以為常上或御午門
示御製詩使儒臣奉和時尚書夏原吉侍其母往觀鰲
山上聞之曰賢母也賜鈔二百錠

金定四庫全書
卷三
十夜燈 帝京景物畧上元三夜燈始于唐五夜燈始
于北宋六夜燈始于南宋而十夜燈則始自明代也
太祖建南都放燈十日今北都燈市起初八至十三
而盛迄十七乃罷也

立成百首 明彭時集劉定之資極穎敏一日中使傳
旨命製元宵詩公據几不停揮頃刻成四句七言詩
百首以進

報獻燈 明紀事本末宣德元年高煦遣人獻元宵燈

或曰此是窺瞰朝廷特以進獻為名耳上曰吾惟推誠待之復書報謝

罷烟火 五朝注畧神宗問居正元夕鰲山烟火祖制乎居正曰非也成化時以奉母后當時多諫者隆慶時方歲俱耳乃命罷之

觀燈計歲 明袁凱集偕王叔明黃元吉錢伯雲張夢辰金彥振元夕觀燈會于蕭塘隱居景元舉酒屬客曰七人四百九十歲以燈字為韻以此為首句因賦

此

與婦飲 楊維禎元夕與婦飲詩問夜夜何其睠茲燈
火夕老婦記節序清夜羅酒席

憲王樂府 李孟陽汴中元夕詩中山孺子倚新粧鄭
女燕姬獨擅場齊唱憲王春樂府金梁橋外月如霜
走橋 明張宿走百病詩白綾衫照月光殊走過橋來
百病無再過前門釘觸手一行直得一年娛帝京景
物畧上元時婦女相率宵行以消疾病曰走百病又